

Euskal Unibertsital barrutia

Agur, jaunok!

Gihartsu etorri zaigu zuen aldizkaria berriro ere. Beharrezkoa dugu Euskal Herrian, eztabaidan dabiltzan gai eta arazoei sakonetik eta zabaletik helduko dien aldizkaria.

Baina ez dut hortaz mintzatu nahi nere gutun honetan. Lehen zenbakian erabili duzuen gai nagusiaz agertu nahi ditut neure kezak.

Euskal Unibertsitatea ahoz-ahoz, hitzalditan, meeting-etan, alderdien propagandan dabilen gaia da. Baina beldur naiz sarritan slogan hutsa ote duten bihurtu alderdi politikoei. Hauen programetan ikusi nahi dugu Euskal Unibertsitaterako eta Euskal Kultura eta Irakaskuntza osorako programa zehazturik.

Esku artean daukat Unibertsitateko Euskal Kultur Taldeek kalera zabaldu duten orrialde bat: «Hego Euskal Herriko Barruti bakar baretarantz». JAKIN Aldizkarian ere idazle batek baino gehiagok jartzen du **lehen urrats bezala** Unibertsital Barruti hori, Euskal Unibertsitatearen arazoa geure eskuetan ukan dezagun.

Datorren ikastarorako Hego Euskal Herrirako Unibertsital Barruti bakarra lortu behar dugu. Baina oso gogotan edukiaz, Euskal Barrutia benetako Euskal Unibertsitatea lortzeko lehen urratsa besterik ez dela.

Politik Taldeak ez dira elkartuko kanpaina hau aurrera eramateko: Horik itota dabilta beren arteko eta barruko arazoetan eta Hauteskundeetarako politikan. Baina Hauteskundeetarako propagandan ere definizio bat eskatu behar diegu Euskal Unibertsitateari eta Euskal Kulturari buruz.

Dena dela, egoki ikusten dut Unibertsitateko Euskal Kultur Taldeek kaleratu duten kanpaina; beraiek gida dezakete kanpaina hau. Baina Unibertsitateetik kanpoko beste euskal kultur talde guztiek hartu beharko lukete parte kanpaina horretan, herria bera ere mobilizatuz.

Eta kanpaina honek bere gailurra Udako Euskal Unibertsitatean ukan beharko luke.

J. G.

Bilbon Unibertsitari

Baionako Asteak eta UEU

Irakurria dut zuen lehen zenbakia, artikulu zein baino zein intergarriagoz hornitua. Euskal Unibertsitateaz ari zaretenean artikulu denak hain onak ez izanik ere, ez du atxakiarik zenbakiak: nahi eta nahi ez, numero hau behin eta berriz aipatu beharra izango da.